

Kontuola

ANTZUOLA / Egubakoitza / 2004ko abenduaren 17a / 226. zenbakia

KOORDINATZAILEA: Aintzane Irizar • Barrenkalea 33 20570 BERGARA • Tel.: 943 76 03 97 • Faxa: 943 76 29 77 • Posta elektronikoa: kontuola@goiena.com • Lege gordailua: SS1179/02

Ekitaldiz beteta datorkigu Gabon inguruko egitaraua

AINZANE IRIZAR

Antzerkia, Gabon kantak, mendi irteera, umeendako jolasak... Denetik izango dugu aurten ere Gabon jaietan. Bihar bertan, Gabonen atarian, Antzerkiola Imaginarioak Ardoaz bakarrizketa eskainiko digu, Ander Lipus aktore ezagunaren eskutik.

Gabonen atarian gaude, eta ekitaldiz beteta datozkigu datozen asteak. Bihar, zapatua, izango dugu lehendabiziko ekitaldia; Ander Lipus Antzerkiola Imaginarioko aktoreak, *Ardoaz* bakarrizketa taularatuko digu. Olanan etxeko aretoan izango da hori, 22:00etan. Underground-en trilogia osatzen duten bakarrizketetako bat dugu *Ardoaz*; beste biak dira *Minutu bakarra* eta *Mis rarezas dirias tu*.

Martitzen arratsaldean, hilak 21, Santo Tomas azoka egingo dute Herri Ikastetxeko neska-mutikoek; hantxe jarriko dituzte ikusgai baserriko era guztietako produktuak, bai jakiak, baita animaliak ere.

Gabon egunean herriko hainbat talde irtengo dira kantura.



ANTZERKIOLA IMAGINARIOA

Ander Lipusek *Ardoaz* bakarrizketa eskainiko digu bihar, zapatua.

Goizean, Herri Ikastetxekoek egingo dute kantu kalejira, eta arratsaldean, abesbatzakoen eta euskal presoan aldeko kalejirak izango ditugu. Abenduaren 30ean,

goiz eta arratsaldez, umeendako jolas parkea egongo da; abenduaren 31n, azkenik, urteko azkeneko mendi irteera egingo dute Arrolakoek, Aizkorriara.

HERRI IKASTETXEA

Ate Irekien Eguna egingo dute eskolan

Etzi, domeka, Ate Irekien Eguna izango da Herri Ikastetxean. Goiz osoan egongo da zabalik ikastetxea, 11:00etatik 14:00etara, eta herri osoa dago gonbidatuta, ez gurasoak bakarrik. Ikastetxea bera ikusteko aukera izateaz gain, umeek egindako lanak ere jarriko dituzte ikusgai. Baita ikasle ohien aspaldiko argazkiak, diapositibak, eta abar ere. Jatekoa eta edatekoa ere banatuko dute ikastetxeko arduradunek, eskola bisitatzera joaten diren herritarren artean.

GURASOEI ESKERRAK EMAN NAHI

Horrelako egun bat antolatuta zuten azkeneko aldia izan zen ikastetxea inauguratu zuten eguna, orain dela hamabost bat urte.

Aurreko ikasturterako jantokia egin zuten. Bestalde, ikastetxeko azken solairuan, liburutegia eta ikus-entzunezkoen gela egokitu zituzten, eta guraso askok jardun zuen han lanean. Horrela, berrikuntza horiek erakutsi eta lanetan parte hartu zuten gurasoei eskerrak eman nahi dizkiete ikastetxeko arduradunek.



ARTIBOZA

Besteak beste, jantokia ikusteko aukera izango dute herritarrek.

HERRITARREN HITZA / Patxi Olabarria • Langilea

Urteari erreparasoa

Urtea bukatzen ari den honetan, balorazioa egiteko garaia ere iritsi da. Egia esateko, ez da pozik egotekoa: aurten beste bi antzularrek probatu dute zer den tortura eta iaz baino preso bat gehiago dugu. Besarkada bat hiruroi!

Hala ere, gauza positiboak ere eman dizkigu aurtengo urteak: Aiherra-Antzuola Lasterkaldia eta horren inguruan ospatu ziren ekitaldi guztiek egundoko arrakasta izan zuten. Benetan egun zoragarriak izan ziren eta argi gelditu zen elkarri bizkarra eman beharrean, elkarrekin

gauza handiak egin ditzakegula.

Baina euforia hark sei egun besterik ez zituen iraun. Hurrengo ostiral goizeko 8etako plenoan, PNV-EAko alkate eta zinegotziek egun gutxi batzuk lehenago hainbeste erabili zituzten elkartasuna, herritarren partehartzea, anaikidetzeta eta elkar-lana bezalako hitzak bat-batean ahaztu egin zituzten. Beheko Auzoan 50 etxebizitza



“Uste dute behin hauteskundeak irabazita, edozer egin daitekeela”

egin eta Sagastiko parkea suntsitzearen aurka herritar mordo batek aurkeztutako sujerentzia bat bera ere ez zuten onartu. Beraiek beraienarekin jarraitzen dute. Bost antzular horiek uste dute behin hauteskundeak irabaziz gero edozer gauza egin daitekeela. Ba ez! Hauteskunde

programan inondik inora ez zenituzten aipatzen orain egin nahi dituzuen obra guzti

horiek, beraz, ez esan herritarrek hori nahi dutela.

Bukatzeko, plenotan galdetzeko bi egun lehenago baimena eskatu behar dugunez, ohiturari jarraituz, Alkate Jauna, zure baimenarekin galdera bat egin nahi nizuke. Erantzuteko hartu nahi duzun denbora guztia, baina uste dut antzularrok erantzun bat merezi dugula. Hauxe da nire galdera: Buztinzuriko baldosen koloreari buruz herriari galdetu bazenioten, zergatik ez duzue herri galdeketa egin nahi Antzulari horrenbeste eragiten dien proiektu hauen inguruan?

KIROLA

PARTIDUAK

FUTBOLA

Abenduak 18
11:00: Antzuola-Bergara (Neskek)
15:30: Antzuola-Lagun Onak (Erreg.)
17:30: Antzuola-Amara Berri (Gazteak)

EMAITZAK

FUTBOLA

Santo Tomas 1 Antzuola 2 (Gazteak)
Antzuola 9 Soraluze 1 (Kadeteak)
Eibar 7 Antzuola 0 (Neskek)

PILOTA

Gipuzkoako Txapelketa
Ilunpe-Olalde (Eskuz kad.) 22-4
Eskoriatza-Olalde (Eskuz inf.) . . . 18-17
Olalde-Altzatarrak II (Paletaz) . . . 30-35

PRESOAK

'600 baietz!' kanpaina abiarazi dute Patxi Cabori laguntzeko

AINTZANE IRIZAR

Patxi Caboren koadrilako lagunek 600 euro baietz! kanpaina abiarazi dute. Kanpainaren helburua da hilerok-hilerok, herritarren artean, 600 euro batzea. Diru hori izango da Patxiaren etxebizitzaren mailegua ordaintzeko, preso dagoen bitartean.

Azaroaren 16an atxilotu zuten Patxi eta Martuteneko espetxean dago preso. Gauzak horrela, eta etxebizitza ordaintzeko maileguari aurre ezin diola egin ikusita, *600 euro baietz!* ekimena abiarazi dute bere lagunek.

Ekimen horren helburua zera da: herritarren artean, hilean 600 euro batzea, maileguari aurre egin ahal izateko. Horretarako, hilerok bost euro ordaintzeko prest egongo lirakeen 120 herritar lortu nahi dituzte. Patxi epaitu arte edo aske geratu arte jarraituko dute ekimenarekin.

Ekimenean parte hartu nahi dutenek horretarako aukera izango dute Larrea eta Gailur tabernetan izena emanda edo Patxiaren



Koadrilako lagunek abiarazi dute Patxiaren aldeko kanpaina.

koadrilakoekin berba eginda. Herriko enpresa nagusienetan ere osatu dituzte taldeak informazioa emateko.

Abenduan egingo dute kanpaina eta urtarrilean hasiko dira dirua batzen.

MARTUTENEN, ASTELEHENETIK

Atxilotu eta astebetera, azaroaren 23an, hain zuzen ere, Arrasateko ospitalera eramán zuten Patxi, eta ebakuntza egin zioten. Hantxe egon da abenduaren 13ra arte. Ordutik hona Martutenen dago.



Pilotako finalak bihar, zapatua

Bihar, zapatua, jokatu dute Herri Mailako Eskuz Bina-kako Pilota Txapelketako finala. Udal Pilotalekuan izango da partidu hori, 18:30ean. Mikel Urtzelaik eta Jon Gurutz Biterik aurrez aurre izango dituzte Julen Iparra-girre eta Mikel Larrañaga.

Juan Simon Aristik eta Jose Manuel Aranburuk, berriz, Luis Larrea eta Jon Aranguren aurka jokatu dute, hirugarren postua erabakitzeko. Argazkian, final nagusia jokatu duten pilotariak./A. I.

LABUR

Areto futboleko 24 orduak hilaren 28tik 29ra

Gazte Asanbladak antolatuta, areto futboleko 24 orduko txapelketa izango dugu hilaren 28tik 29ra, frontoian. Talde bakoitzak 40 euro ordaindu beharko ditu izena ematera-koan. Horretarako aukera duzue hilaren 20ra arte, gaztetxean eta Surpe, Larrea eta Gailur tabernetan.

Alfonso Castroren oroimenezko areto futbol txapelketa

AKEk antolatuta, Alfonso Castroren oroimenezko V. Areto Futbol Txapelketa jokatu dute hilaren 27an eta 28an, frontoian. 8 eta 14 urte bitarteko neska-mutikoendako txapelketa da hori.

Astelehen goizean hasi eta martitzen eguerdian bukatuko da txapelketa.

Barkeroren omenezko partidua hilaren 30ean

Urtero bezala, Xabier Barkeroren omenezko partidua jokatu dute. Bosgarren aldia da aurtengoa. Hilaren 30ean izango da hori, Estalan, 16:00etan. Barkeroren taldekide izandakoek gaur egungo jokalarien aurka jardungo dute. Iluntzean, berriz, lagun arteko afaria egingo dute.

Domekan, hilak 12, independentziaren 375. urteurrena

Aurreko asteko domekan, hilak 12, bete ziren 375 urte Antzuolak independentzia lortu zuela. 1629. urteko abenduaren 12an, hain zuzen ere, gertatu zen hori. Gazte Asanbladako kideek adierazi digutenez, iaz bezala, aurreko martxorako antolatuko dute Independentzia Eguna.

IRAKURLIAREN TXOKUA

UDALAREN JOKAERA DELA ETA Beheko Auzokook ez gaude ados Arau Subsidiarioak aldatzeko Udalaren erabakiarekin, ezta bere jarrerarekin eta Toledo Taldearen txosten teknikoarekin ere. Arauok aldatzeko erabakiak prozesu garrantzitsua irerki du, baina, tamalez, afektatutako auzokoen eta udal ordezkarietatik kanpo dauden alderdien iritziak kontuan hartu gabe egin da.

Bestalde, Toledo Taldeak bat-batean gure auzoarekiko azaldu duen sentsibilitatea susmagarria iruditzen zaigu, zera onartzen duenean: "necesidad prioritaria de intervenir en la cohesión urbana de la zona de Beheko Auzoa, historicamente deficitaria y marginada". Toledok urteak daramatza herrian lanean eta sekula ez dio gure auzoa hobetzeari lehentasunik eman.

Egia da auzoak hobekuntza integrala behar dela, herriarekiko kohesioa barne; baina, ez dugu uste 50 etxebizitza egiteak inguruko auzotarren bizi-kalitatea hobetuko duenik, are gutxiago, eremu hain txiki-eginda eta aisialdi eremu hain garrantzitsuenak kenduta; ostera, Beheko Auzoko etxebizitzaren egoerak okerrera egingo du.

Prozesu honetan, salagarria da EAJko alkatearen jarrera hertsia, ez demokratikoa eta sentsibilitate gabekoa, berak gauza asko egitearren ez die inongo kasurik egiten bere planak zalan-tzan jartzen dituztenei. Auzokoekin egindako batzar informatzaile baten zera esan zuen: "plana aurrera eramango dugu zuek ados ez bazaudete ere". Gure iritzi, hauek ez dira herritarren interesa eta partaide-tza bultzatzeko jarrera egokiak. Herritarren iritziak jaso beharko lituzkete.

BEHEKO AUZOKO BATZORDEA



Jose Luis Zabalo

Kalegoi 9, 1. solairua
ANTZUOLA.
Tel. 943 76 60 89
Faxa: 943 76 60 14

ZAHAR BERRITZEAK:

Fatxadak
Bainugela eta sukaldea
Lokal komertzialak
Teilatuak

**Eta orain....
GREMIOEN
KOORDINAZIOA**

SUKALDEKO ALTZARIAK
Harizki

**MUEBLES
IGEA**

Sukalderako eta
bainurako altzariak
Altzari rustikoetan
espezializatuak

Zurrategi plaza 4, behe. ANTZUOLA. Tel. eta faxa 943 78 71 80